

共同經課-1 創世記十七章一節～七節，十五節～十六節

1 亞伯蘭九十九歲 ê 時，耶和華對亞伯蘭顯現，kā 伊講，我是全能 ê 上帝，你 tī 我 ê 面前行做 tiòh 完全。2 我 beh kap 你立我 ê 約，hō 你 ê 後裔極其 choē。3 亞伯蘭就仆落 tī 地裡；上帝 koh kap 伊講話，講，4 我 kap 你立我 ê 約，你 beh 做 choē-choē 國 ê 父。5 Tùi taⁿ 以後，你 ê 名無 koh 叫做亞伯蘭，是 beh 叫做亞伯拉罕，因為我已經立你做 choē-choē 國 ê 父。6 我 beh hō 你 ê 後裔極其 choē，國度 tùi 你來立，君王 tùi 你來出。7 我 beh kap 你，以及你歷代 ê 後裔，設立我 ê 約做永遠 ê 約；是 beh 做你 kap 你 ê 後裔 ê 上帝。15 上帝 koh 對亞伯拉罕講，你 ê bó 撒萊，m̄-thang koh 叫伊 ê 名撒萊；伊 ê 名 beh 叫做撒拉。16 我 beh 賜福伊，我亦 beh hō 你 tùi 伊得 tiòh 一個 kiáⁿ；我 beh 賜福伊，伊亦 beh 做列國 ê 老母；beh 有邦國 ê 王 tùi 伊出。

共同經課-2 詩篇二十二篇二十三節～三十一節

23 Lín 驚畏耶和華 ê，tiòh o-ló 伊；雅各 ê 後裔，lóng tiòh 榮光伊。以色列 ê 後裔，lóng tiòh 敬畏伊。24 因為伊無看輕，亦無厭賤，困苦人 ê 困苦；亦無對伊掩面；伊求叫伊 ê 時，伊就聽伊。25 我 tī 大聚會 ê 中間所 o-ló-ê，是 tùi 你來；我 beh tī 驚畏伊 ê 人 ê 面前，謝我 ê 願。26 謙卑 ê 人 beh 得 tiòh 食飽；Chhē 耶和華 ê 人 beh o-ló 伊；願 lín ê 心活到永遠。27 地 ê 極頭 lóng beh siàu 念，來歸順耶和華；列邦 ê 萬族 lóng beh 敬拜 tī 你 ê 面前。28 因為國是耶和華 ê；伊是萬國 ê 主宰。29 地上一切好漢 ê 人 beh lim 食來敬拜；見若歸土 ê 人，boē 能保全性命 ê，lóng beh 仆拜 tī 祂 ê 面前。30 有後裔 beh 服事伊；主 ê tāi-chì beh 傳 tī 後代。31 In beh 來，亦 beh 傳伊 ê 公義，Hhou7 得 beh 出世 ê 百姓知 chit-ê 事是伊做 ê。

共同經課-3 羅馬書四章十三節～二十五節

13 因為所應允亞伯拉罕 kap 伊 ê 後裔做後嗣承接世間 ê，m̄ 是 tùi 律法，是 tùi 信 ê 義。14 因為若屬律法 ê 做後嗣，信就歸 tī 空空，應允也廢無。15 因為律法是致到受氣；若無律法，就無犯 tiòh。16 所以是 tùi 信，thang 照恩典，beh hō 應允堅固 tī 眾後裔，m̄-nā tī hit-ê 屬律法 ê，也 tī 屬亞伯拉罕 ê 信 ê，17 伊 tī 伊所信 ê 上帝 ê 面前做咱眾人 ê 父，就是 hit-ê hō 死人 koh 活，叫 hiah-ê 無 ê ná 親像有 ê 上帝；照所記載講，我設立你做 choē-choē 邦國 ê 父。18 伊 tī 無 thang òng 望 ê 中間，tùi òng 望來信，hō 伊 thang 成做 choē-choē 邦國 ê 父，照所 bat 講 ê，你 ê 後裔 beh 親像 án-ni。19 伊想 tiòh 家己 ê 身軀親像已經死，(hit 時 chiáⁿ 百歲)，koh 撒拉 ê 胎孕已經絕，伊 ê 信無軟 chiáⁿ；20 伊看上帝 ê 應允，也無 tùi m̄ 信來僥疑；21 信就 ná 勇健，來歸榮光上帝；22 koh 深信上帝能成伊所應允 ê；所以 kā 伊算做義。23 Taⁿ 所講，kā 伊算，chit 句 m̄ 是 kan-ta 為 tiòh 伊來寫，也是為 tiòh 咱；24 咱若信靠 hit-ê hō 咱 ê 主耶穌 tùi 死人中 koh 活 ê 上帝，也 beh kā 咱算做義。25 耶穌 bat 為 tiòh 咱 ê 罪受解送，koh 為 tiòh 咱 ê 稱做義來得 tiòh koh 活。

共同經課-4 馬可福音八章三十一節～三十八節

31 就教示 in 講，人子的確 tiòh 受 choē-choē 苦楚，hō chiah-ê 長老、祭司頭、經學士棄 sak，koh 受害死，過三日就 koh 活。32 耶穌用 chit-ê 話明明 kā in 講。彼得牽來責備伊。33 但是伊 oát-tng 身看伊 ê 學生，就責備彼得講，撒旦，退去我 ê 後面；因為你所想 m̄ 是上帝 ê 事，是人 ê 事。34 就叫眾人 kap 伊 ê 學生來，kā in 講，若有人 ài tè 我，就 tiòh 看無家己，giá 伊 ê 十字架，來 tè 我。35 因為見若 ài 救伊 ê 性命 ê beh 失落伊；見若為 tiòh 我 kap 福音來失落伊 ê 性命 ê beh 救伊。36 人若得 tiòh 全世界，來喪失伊 ê 性命，有甚麼利益？37 因為人 beh 出甚麼來對換伊 ê 性命？38 凡若 tī chit-ê 姦淫有罪 ê 世代掠我 kap 我 ê 會做見笑 ê，人子用父 ê 榮光 kap chiah-ê 聖 ê 天使來 ê 時，也 beh 掠伊做見笑。